



Sumáriu Kazu
Tribunál Distritál Baukau
Marsu 2022

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 22

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime Violénsia Doméstika (VD) sira no artigu 36 kona-ba krime sira violénsia doméstika nian hanesan krime públiku)	11
Artigu 145 Kódigu Penál (KP) & artigu 2, 3, no 35 letra (b) (LKVD) no artigu 157 KP	Ofensa ba integridade física simples ho natureza violénsia domestika no ameasa	1
Artigu 145 Kódigu Penál (KP) & artigu 2, 3, no 35 letra (b) (LKVD) no artigu 20 (1) Lei Arma Brankas	Ofensa ba integridade física simples ho natureza violénsia doméstika no arma brankas	1
Artigu 154 KP & artigu 2, 3, no 35 (a) LKVD no artigu 157 KP	Maus-tratus ba kónjuje no ameasa	1

Artigu 154 KP & artigu 2, 3, no 35 (a) LKVD	Maus-tratus ba kónjuje	1
Artigu 20 (1) Lei Arma Brankas	Arma brankas	1
Artigu 157 KP no Artigu 20 (1) Lei Arma Brankas	Ameasa no arma brankas	1
Artigu 146 KP	Ofensa ba integridade fízika grave	1
Artigu 145 KP	Ofensa ba integridade fízika simples	1
Artigu 258 KP	Danu simples	2
Artigu 258 KP, artigu 251 KP no artigu 145 KP	Danu simples, furtu simples no ofensa ba integridade fízika simples	1
Totál		22

2. Totál desizaun ne'ebé JSMP monitoriza: 22

Tipu desizaun	Artigu	Númeru
Pena prizaun	Artigu 66 KP	1
Suspensaun ba prizaun nia ezekusaun	Artigu 68 KP	8
Suspensaun ba prizaun nia ezekusaun no omologa	Artigu 68 KP no 216 KP	1
Pena multa	Artigu 67 KP	7
Omologa, absolve no suspensaun ba prizaun nia ezekusaun	Artigu 216 no 68 KP	1
Admoestasaun	Artigu 82 KP	1
Omologa dezisténsia keixa	Artigu 216 Kódigu Prosesu Penál (KPP)	2
Absolve		1
Totál		22

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 0

B. Deskrisaun sumáriu julgamentu ba desizaun kazu sira:

1. Krime maus-tratus ba kónjuje no ameasa

Nú. Prosesu : 0020/21. LASIC
Kompozisaun Tribunál : Koletivu
Juis : Dra. Florencia Freias no Dra. Sribuana da Costa no Dr. José António d. Escurial
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Pena prizaun tinan 2

Iha 08 Marsu 2022, Tribunál Distritál Baukau prezide Julgamentu leitura akordaun ba krime maus-tratus ba kónjuje no ameasa ne'ebé envolve arguidu CYFB hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 12 Marsu 2021, iha oras tuku 22:00 kalan, la ho motivu ne'ebé klaru arguidu basa dala ida iha lezada nia hasan parte loos.

Tuir mai iha 14 Marsu 2021, iha oras ne'ebé la apuradu, arguidu basa dala ida iha lezada nia hasan parte karuk. Antes agresaun ne'e, arguidu ho lezada diskute malu kona-ba lezada husu osan ba arguidu atu sosa sira nia oan nia nesisidade.

Iha 18 Marsu 2021, iha oras tuku 23:00 kalan, arguidu foti raket susuk nian tuu dala ida ba lezada nian ain, buti lezada niaibun, tuku dala ida iha lezada nia kotuk laran no tebe dala ida iha lezada nia kelen parte loos. Antes agresaun ne'e, arguidu ho lezada diskute malu kona-ba lezada haree arguidu nia telemovel arguidu foto hakuak malu hela ho fetu seluk, nune'e lezada husu ba arguidu no arguidu hatan katak "*hau atu hola tan fetu ne'e se ó lakohi hau sei oho ó.*"

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 no artigu 157 KP kona-ba krime ameasa ho moldura pena to'o tinan 1 ka multa, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu deklara katak akontesimentu iha 12 marsu 2021 ne'e arguidu la iha kuñesimentu. Enkuantu akontesimentu iha 14 Marsu 2021, arguidu fila husi serbisu haree sasan dapur foer loos hanesan bikan sira la fase, nune'e arguidu komete aktu ne'e hasoru lezada. Akontesimentu iha 18 Marsu 2021, arguidu la halo agresaun hasoru lezada no sira diskute malu de'it no sira hela separa ona.

Iha parte seluk, lezada kontinua konfirma faktu hotu iha akuzasaun no deklara tkatak arguidu ameasa lezada ne'e mak lezada tauk halai to'o agora la fila ba arguidu no arguidu mós agora hola fali ona fetu seluk.

Alegasaun finál

Prokuradór haktuir katak arguidu konfesa parsialmente ba faktu sira iha akuzasaun, maibé lezada kontinua konfirma faktu hotu iha akuzasaun, ho nune'e prokuradór konsidera arguidu provadu komete krime hasoru lezada no konsekuensia husi arguidu ninia aktu ne'e lezada diside moris separa ho arguidu, nune'e husu ba tribunál atu aplika pena efetiva tinan rua fulan neen prizaun ba arguidu.

Enkuantu defeza haktuir katak arguidu deklara de'it faktu ne'ebé nia komete, nune'e husu ba tribunál atu fó pena suspensaun ba arguidu.

Desizaun

Depoisde avalia faktu hotu, tribunál prova katak iha 12 Marsu 2021, arguidu basa dala ida iha lezada nia hasan parte loos. Iha 14 Marsu 2021, arguidu basa dala ida iha lezada nia hasan parte karuk. Iha 18 Marsu 2021, arguidu foti raket susuk nian tuu dala ida ba lezada nian ain, buti lezada niaibun, tuku dala ida iha lezada nia kotuk laran no tebe dala ida iha lezada nia kelen parte loos no arguidu mós ameasa lezada katak "*hau atu hola tan feto se ó lakohi hau sei oho ó.*"

Bazeia ba faktu provadu sira ne'e hotu, tribunál konklui prosesu ne'e no kondena arguidu ho pena prizaun tinan rua.

2. Krime danu simples, furtu simples no ofensa ba integridade fizika simples

Nú. Prosesu : 0033/19. LASIC
Kompozisaun Tribunál : Koletivu
Juis : Dra. Florencia Freitas, Dr. José António d. Escurial, no Dra. Sribuana da Costa
Prokuradór : Dr. Bartolomeu de Araújo
Defeza : Dr. Grigório M. de Lima
Desizaun : Omologa, absolve no pena prizaun fulan 6 suspende ba tinan 1

Iha 08 Marsu 2022, Tribunál Distrital Baukau prezide Julgamentu leitura akordaun ba krime danu simples, furtu simples no ofensa ba integridade fizika simples ne'ebé envolve arguidu Igidio Domingos de Jesus no Eko do Santos hasoru lezadu Junior Casteneiro, Rozito Nunes no Jacarias Barreto Soares, iha Postu Administrasaun Lospalos Munisipiu Lautein.

Akuzasaun Prokuradór

Prokuradór akuza katak iha 03 Maiu 2019, iha oras tuku 14:16 lokraik, arguidu Igidio Domingos de Jesus ense hela mina ba kareta bis Salvacao iha Pertamina Ilicao hamutuk ho arguidu Eko dos Santos nu'udar ajudante ba bis refere. Bainhira to'o iha Pertamina lezadu Rozito Nunes nu'udar empregadu iha Pertamina refere konta hela osan, nune'e arguidu Igidio hase'e lezadu hodi dehan "*ida ne'e osan loron hira nian*",

lezadu Rozito hatan ne'e semana rua nian arguidu Igidio hamrik nafatin hodi haree lezadu Rozito sura osan refere. Depoizde konta hotu tiha osan refere ne'ebé ho total osamentu US\$1, 500.00 lezadu lori osan refere ba rai tiha iha kareta laran. Tuir mai testemuña Tobit bolu lezadu Rozito ba buka xave kareta nian atu lori ba Dili. Nune'e lezadu Rozito hakat ba kotuk buka xave hamutuk ho testemuña Tobit hodi husik hela osan refere iha kareta laran ho odamatan kareta la xave. Bainhira lezadu Rozito buka hela xave kareta iha kotuk arguidu nain rua kumbina atu foti lezadu Rozito nian osan ne'ebé rai hela iha kareta laran. Arguidu Eko do Santos sae ba tuur iha kareta oin osan rai ba no arguidu Igidio hamrik iha odamatan. Bainhira lezadu Rozito mai fali haree arguidu Eko tun husi kareta no arguidu sira mós sai dadaun ona. Nune'e lezadu Rozito mós sura hikak fali osan maibé osan US\$300.00 mak la iha. Lezadu Rozito telefone tuir arguidu Eko katak imi foti osan karik favor fó fila. Arguidu sira mai fali ho motor arguidu Eko diskute malu ho lezadu Rozito nune'e arguidu Igidio nervozu tuku dala ida iha lezadu Rozito nia ulun tuku dala ida iha kotuk laran uza kapasete tuku dala ida iha lezadu nia kanuruk hafoin arguidu Igidio tuku rahun vidru dispenser tanki mina nian ho prejuizu US\$6,700.00 no arguidu Igidio mós tuku dala ida iha lezadu Zacaria Bareto Soares nia ulun.

Prokuradór akuza arguidu sira komete krime iha konkursu kontra artigu 251 (1) KP kona- ba furtu simples ho moldura penal tinan 3 prizaun ka multa, artigu 145 KP kona- ba ofensa ba integridade fizika simples ho moldura penal tinan 3 ka multa no artigu 259 KP kona-ba danu agravadu ho moldura penál tinan 2 to'o 8 prizaun.

Antes tama ba produsaun ba prova bazeia ba artigu 262 Kódigu Prosesu Penál kona- ba tentativa konsiliaun, tribunál halo tentativa konsiliaun ba arguidu sira no lezadu sira relasiona ho krime ofensa ba integridade fizika simples no furtu simples tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, arguidu sira ho lezadu sira deklara katak sira konkorda malu ona katak arguidu sira husu deskupa ba lezadu sira. Ho nune'e, lezadu sira hakarak deziste tiha nia keixa hasoru arguidu sira relasiona ho krime ofensa ba integridade fizika simples rua no furtu simples. Bazeia ba konkordánsia husi parte rua ne'e, tribunál omologa tiha krime ofensa ba integridade fizika simples no furtu simples. Entretantu ba krime danu agravadu, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu Igidio Domingos de Jesus deklara katak iha akontesimentu ne'e arguidu nu'udar sofer bis Salvacao ba ense gazoel iha lezadu sira nia Pertamina, bainhira fila tiha sira telefone tuir dehan arguidu sira naok sira nia osan nune'e arguidu sira fila fali ba Pertamina mosu diskusaun arguidu hirus basa dala ida iha vidru liur dispenser tenki mina nian nakfera, dispenser ne'e agora sira uza hela.

Arguidu Eko do santos deklara katak nu'udar ajudante ba bis Salvacao momentu ne'e ba ense gazoel iha lezadu sira nia Pertamina mak lezadu sira duun arguidu sira naok sira nia osan ne'e mak mosu diskusaun haree ba arguidu Igidio Domingos de Jesus basa dala ida ba vidru dispenser tenki mina refere.

Iha parte seluk lezadu Rozito Nunes no Zacarias Barreto konfirma faktu hotu iha akuzasaun no deklara katak dispenser ne'ebé arguidu tuku rahun di'ak fali ona no bele uza fali ona.

Alende ne'e, lezadu Junior Casteneiro nain ba Pertamina deklara katak iha akontesimentu ne'e la iha fatin akontesimentu maibé lezadu Rozito Nunes no Jacarias Barreto Soares mak konta katak arguidu Igidio Domingos de Jesus mak tuku rahun vidru dispenser mina nian no halo agresaun hasoru sira. Vidru dispenser ne'e medida 20 cm x 40 cm, dispenser kondisaun diak vidru ne'e arguidu foti fali dispenser tuan nian mak monta fali ba vidru nakfera ne'e. vidru ne'e folin boot liu mak US\$50.00 no selu ema hadia boot liu US\$60.00.

Alegasaun finál

Prokuradór haktuir katak vidru de'it mak nafera ho folin boot liu mak US\$50.00 no selu ema hadia ho folin boot liu mak US\$60.00 dispenser ne'e rasik sei diak hela to'o agora, nune'e husu ba tribunál atu halo alterasaun kualifikasaun husi krime danu agravadu ba fali danu simples ho moldura penal tinan to'o tinan 3 ka multa.

Entretantu, defeza haktuir katak parte defeza konkorda prokuradór nia alegasaun atu halo alterasaun kualifikasaun husi danu agravadu ba fali danu simples no absolve arguidu Eko dos santos husi prosesu ne'e no aplika pena ne'ebé adekuadu ba arguidu Igidio Domingos de Jesu

Desizaun

Depoisde avalia faktu hotu, tribunál halo alterasaun kualifikasaun juridiku husi artigu 259 KP kona-ba danu agravadu ba fali artigu 258 KP kona-ba danu simples, tanba valor prejuizu la to'o hanesan iha akuzasaun, arguidu Igidio Domingos de Jesus straga de'it vidru dispenser no vidru refere lezadu foti fali dispenser seluk nian vidru troka fali ona. Arguidu Eko do Santos la provadu komete krime danu simples refere.

Bazeia ba faktu provadu sira ne'e, tribunál konklui prosesu ne'e kondena arguidu Igidio Domingos de Jesus ho pena prizaun fulan neen supende ba tinan ida no absolve arguidu Eko do Santos husi prosesu ne'e.

3. Krime ameasa no arma brankas

Nú. Prosesu : 0018/20. LALAP
Kompozisaun Tribunál : Koletivu

Juis : Dra. Florencia Freias no Dra. Sribuana da Costa Dr. José António d. Escurial
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Omologa no pena prizaun tinan 3 suspende ba tinan 3

Iha 08 Marsu 2022, Tribunál Distritál Baukau prezide julgamentu leitura akordaun ba krime ameasa no arma brankas ne'ebé envolve arguidu Otavio da Gama (mestre) hasoru lezadu Oracio Januario no Estadu RDTL, iha Postu Administrasaun Lautein Munisípiu Lautein.

Akuzasaun Prokuradór

Prokuradór akuza katak iha 12 Marsu 2020, iha oras tuku 08:00 dadeer, lezadu atu ba tesi ai-tahan hodi fó han bibi, arguidu hakilar lezadu nune'e "*hoe ó hein iha ne'e hau ba uma foti katana mai fali*". Depoisde arguidu ho nia aman mai fali, arguidu mak mai kaer ho katana hodi ameasa lezadu atu oho lezadu.

Prokuradór akuza arguidu komete krime iha konkursu kontra artigu 157 KP kona-ba krime ameasa ho moldura penál to'o tinan 2 ka multa no artigu 20 (1), artigu 2 (alinea f) Lei Arma Brankas ho moldura penál tinan 3 to'o tinan 6.

Antes tama ba produsaun ba prova sira, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu no lezada relasiona ho krime ameasa tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, arguidu ho lezada deklarata katak antes ne'e sira rezolve ona problema ne'e tuir tradisaun Timor nian. Ho nune'e, lezada hakarak deziste tiha nia keixa hasoru arguidu relasiona ho krime ameasa ne'e. Bazeia ba konkordánsia husi parte rua ne'e, tribunál omologa tiha krime ameasa ne'e. Entretantu ba krime arma brankas, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu deklarata katak Sra. Julia mak informa ba arguidu katak lezadu hein arguidu iha dalan, nune'e arguidu ho katana ba lezadu nia fatin sira diskute malu no la kleur ema sira mai haketak tiha sira, arguidu nia katana tau iha knuuk no arguidu la hasai katana husi knuuk no la ameasa lezadu, antes ne'e sira iha ona problema kona-ba rai. Arguidu nu'udar mestre ho salariu kada fulan US\$437.00.

Alende ne'e, lezadu Oracio Januario deklarata katak momentu taa ai-tahan atu fó han ba nia bibi la kleur arguidu mai hakilar lezadu, depoisde hakilar tiha lezadu arguidu fila ba uma no derepente arguidu mai fali ho arguidu nia aman no arguidu kaer ho katana hodi diskute malu ho lezadu no ameasa lezadu.

Alegasaun finál

Prokuradór haktuir katak arguidu nu'udar mestre hatene didi'ak kona ba utilizasaun ba sasan kroat hanesan katana, maibé arguidu utiliza sala katana ba ameasa lezadu no prokuradór mantéin faktu sira iha akuzasaun provadu, tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza haktuir katak sira apenas hakilar malu de'it arguidu mós la hasai katana husi knuuk no la uza katana hodi ameasa lezadu, arguidu foin primeiravés mai hatan iha tribunál. Tanba ne'e husu ba tribunal aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak lezadu atu ba tesia ai-tahan hodi fó han bibi, arguidu hakilar lezadu nune'e "*hoe ó hein iha ne'e hau ba uma foti katana mai fali*". Depoisde arguidu ho nia aman mai fali, arguidu mak mai kaer ho katana hodi ameasa lezadu atu oho lezadu.

Bazeia ba faktu provadu sira ne'e, tribunál konklui prosesu ne'e kondena arguidu ho pena prizaun tinan tolu supende ba tinan tolu.

4. Krime ofensa ba integridade fizika grave

Nú. Prosesu	: 0065/19. LASIC
Kompozisaun Tribunál	: Koletivu
Juis	: Dr. José António d. Escurial Dra. Florencia Freias no Dra. Sribuana da Costa
Prokuradór	: Dr. João Marques
Defeza	: Dr. Grigório M. de Lima
Desizaun	: Pena prizaun tinan 3 suspende ba tinan 3

Iha 09 Marsu 2021, Tribunál Distritál Baukau prezide julgamentu leitura akordaun ba krime omisídiu agravadu ne'ebé envolve arguidu Olavio da Costa hasoru lezadu Francisco do Santos, iha Postu Administrativu Lospalos Munisípiu Lautein.

Akuzasaun Prokuradór

Prokuradór akuza katak iha 14 Jullu 2019, iha oras tuku 18:00 lokraik, arguidu ke'e fatuk hodi hada haleu lezadu nia uma no atu halo uma mak lezadu hase'e dehan labele hada fatuk haleu hau nia uma, arguidu hatan dehan entaun hatudu fatin para hau bele halo hau nia uma, ho nune'e arguidu ho foti ai-suak ho nia naruk 107 cm baku lezadu nia ulun lezadu lori liman karuk tahan netik, nune'e ai-suak kona fali lezadu nia liman rezulta liman ruin rua iha laran tohar hafoin testemuña hadau tiha ai-suak refere no emidiata tula lezadu ba Óspital Lospalos no transfere liu ba Óspital Nasionál Guido Valadares Dili.

Prokuradór akuza arguidu kontra artigu 146 (1) KP kona-ba krime ofensa ba integridade física grave ho moldura penál tinan 2 to'o tinan 8.

Produsaun ba prova sira

Iha prosesu julgamentu, arguidu deklara katak lezadu nu'udar nia aman no bainhira arguidu halo nia uma lezadu dehan labele halo uma iha fatin refere, nune'e mosu diskusaun arguidu uza duni ai-suak baku no lezadu hit sae liman mak baku kona lezadu nia liman, lezadu baixa iha ospital aguidu ba haree, arguidu arrepende ona nia hahalok tanba baku fali lezadu nu'udar nian aman, diak malu ona, aguidu foin primeiravés mai hatan iha tribunál.

Alende ne'e, lezadu hili direitu nonook tanba iha relasaun família hanesan arguidu nu'udar lezadu nian oan rasik.

Testemuña Brito dos santos mos hili direitu nonook tanba iha relasaun família hanesan arguidu nu'udar testemuna nia maun rasik.

Alegasaun finál

Prokuradór haktuir katak arguidu konfesa faktu hotu iha akuzasaun mezmú lezadu no testemuña hili direitu nonook, maibé deklarasaun sira iha Ministériu Públiku no relatóriu médiku hatudu katak lezadu nia liman ruin rua tohar, tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza haktuir katak iha produsaun ba prova arguidu konfesa faktu hotu iha akuzasaun mezmú lezadu no testemuna hili direitu nonook maibe arguidu deklara katak sira diak malu ona, arrepende ona nia hahalok no foin primeiravés mai hatan iha tribunál. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoizde avalia faktu hotu, tribunál prova arguidu katak foti ai-suak ho nia naruk 107 cm hodi baku lezadu nia ulun lezadu lori liman karuk tahan netik, nune'e ai-suak kona fali lezadu nia liman rezulta liman ruin rua iha laran tohar.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende nia hahalok, primeiravés mai hatan iha tribunál, nune'e tribunál konklui prosesu ne'e kondena arguidu ho pena prizaun tinan tolu supende ba tinan tolu.

5. Krime maus-tratus ba kónjuje

Nú. Prosesu : 0019/19. LASIC
Kompozisaun Tribunál : Koletivu

Juis : Dra. Sribuana da Costa no Dra. Florencia Freitas, Dr. José António d. Escurial
Prokuradór : Dr. João Marques
Defeza : Dr. Grigório M. de Lima
Desizaun : Pena prizaun tinan 2 suspende ba tinan 2

Iha 23 Marsu 2022, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu CdSd hasoru nian feen, iha Munisípiu Lautein.

Akuzasaun Prokuradór

Prokuradór akuza katak iha 26 Feveireiru 2019, iha oras tuku 15:00 lokraik, arguidu uza basia tuda dala ida kona iha lezada nia liman sikun parte loos, uza tan balde tuda ba lezada, maibé la kona no arguidu mós fakar tan batar bikan ida ne'ebé lezada han hela. Antes agresaun ne'e, arguidu ho lezada diskute malu kona-ba bainhira arguidu fila husi haree karau haree oan sira dada malu ne'e mak arguidu hirus no komete aktu ne'e hasoru lezada.

Durante moris hamutuk arguidu sempre baku lezada hanesan iha tinan 2016, arguidu tuku dala ida iha lezada nia ulun. Iha tinan 2017 arguidu tuku dala ida iha lezada nia ulun no fulan haluha maibé iha tinan 2019, arguidu tuku dala rua iha lezada nia knosen parte karuk, lezada hakilar foin arguidu para nia aktu ne'e.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu deklara katak akontese iha 26 Feveireiru 2019, iha oras tuku 15:00 lokraik ne'e loos hotu no akontese mós iha tinan 2019, ne'e mós tanba momentu ne'e arguidu ho kondisaun lanu. Akontese iha tinan 2016 no 2017 mak arguidu la iha kuñesimentu. Akontese ikus ne'e sira di'ak malu to'o agora la baku ona lezada, arrepende nia hahalok, foin primeiravés mai hatan iha tribunál no arguidu agora dadauk nu'udar bada'en loron ida hetan osan US\$12.00.

Iha parte seluk, lezada deklara katak haluha ona kona ba faktu sira maibé iha tinan 2019, arguidu halo agresaun hasoru lezada ne'e dala rua no antes tinan 2019 mós arguidu halo agresaun hasoru lezada. Akontesimentu sira ne'e ninia motivu mak kona-ba labariak sira. Bainhira lezada hato'o tiha keixa iha Polísia to'o agora arguidu la baku ona lezada.

Alegasaun finál

Prokuradór haktuir katak durante moris hamutuk arguidu sempre halo agresaun hasoru lezada no bainhira lezada ba ható'o tiha keixa iha Polísia foin arguidu hapara nia konduta ne'e. Arguidu halo tratamentu kruel hasoru lezada nu'udar nia feen, nune'e husu ba tribunál atu aplika pena prizaun tinan tolu suspende ba tinan tolu.

Enkuantu defeza haktuir katak tau konsiderasaun ba arguidu nia deklarasaun perante tribunál katak apenas baku deit dala rua iha tinan 2019, akontese 2016 no 2017 arguidu la iha kuñesimentu, arrepende nia hahalok, di'ak malu ona no foin primeiravés mai hatan iha tribunál nune'e parte defeza konkorda prokuradór nian alegasaun.

Desizaun

Depoisde avalia faktu hotu, tribunál prova katak arguidu uza basia tuda dala ida kona iha lezada nia liman sikun parte loos, uza tan balde tuda ba lezada, maibé la kona no arguidu mós fakar tan batar bikan ida ne'ebé lezada han hela. Tinan 2016 arguidu tuku dala ida iha lezada nia ulun. Iha tinan 2017 arguidu tuku dala ida iha lezada nia ulun no fulan haluha maibé iha tinan 2019, arguidu tuku dala rua iha lezada nia knosen parte karuk lezada hakilar foin arguidu para nia aktu ne'e.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende nia hahalok, primeiravés mai hatan iha tribunál, nune'e tribunál konklui prosesu ne'e kondena arguidu ho pena prizaun tinan rua supende ba tinan rua.

6. Krime danu simples

Nú. Prosesu	: 0002/21. BCBCV
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Ambrosio Rangel Freitas
Defeza	: Dr. Sidonio Maria sarmento
Desizaun	: Omologa dezisténsia keixa

Iha 11 Marsu 2022, Tribunál Distritál Baukau prezide julgamentu tentativa konsiliaun no omologa krime danu simples ne'ebé envolve arguidu Agostino Manuel da Silva no Alcino da Silva hasoru lezadu Jose Sabino da Silva, iha Postu Administrativu Baukau Vila Munisípiu Baukau.

Akuzasaun prokuradór

Prokuradór akuza katak iha 01 Janeiro 2021, iha oras tuku 00:30 kalan, iha akontesimentu ida iha estrada públiku ema barak haklalak no arguidu Agostino Manuel da Silva nia uma mós hetan tuda lezadu haree arguidu Agostino Manuel da Silva sai mai ema tuda kona arguidu nia liman parte karuk no kanuruk no lezadu nia uma mós hetan tuda. Akontesimentu ne'e arguidu ható'o keixa hasoru lezadu kona-ba krime ofensa ba integridade fizika simples maibé prosesu ne'e arguidu Agostino Manuel da

silva rasik deziste tiha keixa hasoru lezadu. Lezadu haree katak arguidu sira mak fó sinal ba ema hodi tuda lezadu nia uma, hodi estraga hotu kalen tahan tolu ho valor osan US\$9.00, odamatan rua valor osan US\$160.00, janela haat valor osan US\$240.00, vidru armari valor osan US\$20.00 no ampolas Philips valor osan US\$3.00. total prejuizu ho valor osan hamutuk US\$432.00.

Prokuradór akuza arguidu sira hanesan koa-autoria kontra artigu 258 KP kona-ba danu simples ho moldura penal to'o tinan 3 ka multa.

Tentativa konsiliaun

Bazeia ba artigu 262 KPP antes tama ba iha produsaun ba prova tribunál halo tentativa konsiliaun ba krime sira ho natureza semi-públiku. Iha prosesu tentativa konsiliaun ne'e lezada hakarak deziste ninia keixa hasoru arguidu sira, maibé ho kondisaun katak ba futuru arguidu sira la bele halo tan kulaker krime hasoru lezadu ho nia família tanba sira família avo mane maun alin rasik. Entretantu arguidu sira simu lezadu nia pedidu no perante tribunál husu deskulpa ba lezadu no promente perante tribunál sira sei moris harmonia iha sira ambiente tuir kultura ne'ebé iha.

Alegasaun finál

Prokuradór haktuir katak iha tentativa konsiliaun ne'e lezadu la husu prejuizu danu ne'ebé iha, maibé husu arguidu sira muda sira nia hahalok iha futuru nu'udar família, arguidu sira husu ona deskulpa maibé tenki ho laran tanba arguidu sira naran rejistu ona iha tribunál. Tanba ne'e husu ba tribunál omologa dezisténsia keixa no absolve arguidu sira husi prosesu.

Entretantu, defeza haktuir katak arguidu sira husu ona deskulpa ba lezadu nu'udar família avo mane maun ho alin. Nune'e husu ba tribunál omologa dezisténsia keixa no absolve arguidu sira husi prosesu ne'e.

Desizaun

Bazeia ba parte rua ninia akordu dame ne'e, tribunál konklui prosesu ne'e no omologa akordu dame ne'e.

7. Krime ofensa ba integridade fizika simples

Nú. Prosesu	: 0008/20. MNMNT
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrosio Rangel Freitas
Defeza	: Dr. Grigorio M. de Lima
Desizaun	: Pena multa US\$90.00

Iha 14 Marsu 2021, Tribunál Distrital Baukau prezide Julgamentu edital ba krime ofensa ba integridade fizika simples ne'ebé envolve arguidu Antonio Francisco de Jesus Soares (membro F-FDTL) hasoru lezadu Fredinadus Manek Samara (edital) iha Postu Administrativu Manatuto, Munisípiu Manatuto.

Akuzasaun Prokuradór

Prokuradór akuza katak iha 26 Janeiru 2020, iha oras tuku 17:00 lokraik, lezadu lori kareta ba para iha nia feen nia uma derepente arguidu mai ho fatuk iha liman tuku dala barak iha lezadu nian ulun, hasan, liman no arguidu mós tebe lezadu nia kanotak, kotuk laran rezulta lezadu monu ba rai. Arguidu mós dehan ba lezada “*ó mangame hau tiru mate ó hau oho tiha ó asu*” lakleur polísia to’o lori lezadu ba halo tratamentu iha Sentru Saude Manatuto.

Prokuradór akuza arguidu kontra artigu 145 KP kona-ba ofensa ba integridade fízika simples ho muldura penal to’o tinan 3 ka multa.

Produsaun ba prova sira

Iha prosesu julgamentu, arguidu deklara katak lezadu uza kareta fuzu soke nia bin nia kioske ne’e mak arguidu nervozu hodi tuku dala neen iha lezada nia isin laos tuku dala barak. Lezadu nu’udar arguidu nia rian tanba kaben ho arguidu nia feton boot. Arguidu mós deklara katak iha tinan 2017, mai hatan ona iha tribunál ba krime seluk hetan pena suspensaun tinan ida fulan neen.

Iha julgamentu tribunál labele rona lezadu ninia deklarasaun, tanba lezadu edital.

Testemuña Berta Soares nu’udar arguidu nia bin, depoimenta katak momentu ne’e testemuña iha nia kioske laran faan SDSB no hamrik iha estrada mak haree arguidu tuku lezada nune’e testemuña mós tauk halai tiha.

Alegasaun finál

Prokuradór haktuir katak iha produsaun ba prova arguidu sira konfesa parcialmente ba faktu sira iha akuzasaun, no testemuña mós depoimenta parsial maibé prokuradór nafatin tau krebilidade ba lezadu nia deklarasaun iha prokuradór nia fatin no mantéin akuzasaun no arguidu nu’udar membru F-FDTL hatene loloos regra sira no arguidu antes ne’e halo ona krime no tribunál kondena ona arguidu, maibé arguidu la hatudu ninia arrendementu. Tanba ne’e husu ba tribunál atu kondena arguidu ho pena prizaun tinan rua suspende ba tinan tolu.

Entretantu, defeza akresenta katak tau konsiderasaun ba arguidu nia deklarasaun, prosesu ne’e lezadu mak apresenta keixa maibé lezadu rasik la kopera ho tribunál. Pena ne’ebe prokurador husu ne’e todan liu ba arguidu tanba arguidu nu’udar militar bainhira hala’o sira nian serbisu dala ruma komunidadade interfeta sala bele halo todan fali arguidu. Tanba ne’e husu ba tribunal fó pena ne’ebé adekuadu ba arguidu.

Desizaun

Depoisde avalia faktu hotu, tribunál konsidera faktu hotu privadu, bazeia ba faktu provadu hirak ne’e tribunál konklui prosesu ne’e no kondena arguidu ho pena multa US\$90.00 ne’ebé arguidu sei selu US\$1.00 kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

8. Krime arma brankas

Nú. Prosesu : 0109/18. BCBCV
Kompozisaun Tribunál : Koletivu
Juis : Dra. Sribuana da Costa, Dra. Florencia Freitas no Dra.
Jumiaty Maria Freitas
Prokuradór : Dr. João Marques
Defeza : Dr. Grigorio M. de Lima
Desizaun : Absolve

Iha 17 Marsu 2021, Tribunál Distritál Baukau prezide julgamentu tentativa konsiliaisaun ba krime ofensa ba integridade física simples no arma Brankas ne'ebé envolve arguidu Salvador Morreira hasoru Marcelino da Silva no Estadu RDTL iha Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak 13 Agostu 2018, iha oras tuku 14:00 lokraik, lezadu nu'udar ajudanti ba kareta mikrolet no tula pasajeiru sira to'o iha kampung Baru arguidu korta kareta ho nia maluk taka hotu oin mai tuku dala ida iha lezadu nia ulun no uza samurai sona iha lezadu nia ulun parte karuk.

Prokuradór akuza arguidu kontra artigu 20 (1) husi Lei Arma Brankas ho moldura penál tinan 3 to'o tinan 6.

Produsaun ba prova sira

Iha prosesu julgamentu, arguidu deklara katak iha akontesimentu ne'e arguidu atu ba taa akadiru mak Sr. Basilio ho nia grupu hamutuk nain hitu ameasa lezadu dehan para lai kareta, tanba tauk arguidu mós para kareta refere, bainhira para tiha kareta Sr. Basilio ho nian grupu sai mai halo problema ho lezadu ho ninian maluk tanba arguidu tauk halai tiha, lezadu temi arguidu nian naran ne'e mak arguidu mós kumpri de'it no tuir loloos Sr. Basilio mak halo problema ho sira la'os arguidu.

Testemuña Rogeiro Domingos da Costa Perreira depoimentu katak momentu ne'e testemuña tuur iha kareta oin besik kondutor no haree ba arguidu taka slayer ba nia ibun para kareta hanesan pasajeiru, bainhira kareta para testemuña sei konverse ho arguidu derepente ema sai barak kareta tarutu kondutor mós aranka kareta halai mak haree lezadu kanek ona la hatene se mak halo kanek.

Alegasaun finál

Prokuradór haktuir katak testemuña haree arguidu mak para netik kareta hafoin grupu husi kotuk mai halo agresaun inklui uza samurai halo kanek lezadu, atu prevene arguidu nia aktu labele akontese tan iha futuru, husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza akresenta katak iha produsaun ba prova arguidu deklara katak nia hetan ameasa husi Sr. Basilio ho nian grupu ne'e mak nia para kareta, la'os korta kareta testemuña mós haree arguidu uza slayer kesi netik nia ibun tanba arguidu mós

tauk atu iha futuru ema bele odriu fali nia. Ho razaun hirak ne'e husu ba tribunál absolve arguidu husi prosesu.

Dezisaun

Depoisde avalia faktu hotu, tribunál konsidera katak faktu hotu la provadu, ho nune'e tribunál konklui prosesu ne'e no absolve arguidu husi prosesu ne'e.

9. Krime ofensa ba integridade física simples ho natureza violénsia doméstika

Nú. Prosesu : 0018/21. VQSIC
Kompozisaun Tribunál : Singulár
Juis : Dra. Sribuana da Costa
Prokuradór : Dr. Julio da Silva Correia
Defeza : Dr. Antonio Fernandes
Desizaun : Pena prizaun fulan 3 suspende ba tinan 1

Iha 21 Marsu 2022, Tribunál Distrital Baukau liuhusi tribunál movel iha Munisípiu Vikeke prezide Julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu CdJA hasoru nia feen, iha Munisípiu Vikeke.

Akuzasaun prokuradór

Prokuradóra akuza katak iha 24 Agostu 2021, iha oras tuku 10:00 dadeer, arguidu tolok lezada, basa dala barak iha lezada nia hasan parte karuk no loos, rasta lezada no buti iha lezada nia ibun. Antes agresaun ne'e. arguidu ho lezada diskute malu kona-ba lezada la habai etu restu, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun arguidu mós deklarara katak arrepende nia hahalok, di'ak malu ona ho lezada no forma família dezde tinan 2014, iha oan nain tolu foin primeiravés komete krime no mai hatan iha tribunál, arguidu deklarara liután katak serbisu hanesan funsionáriu ho vensimentu kada fulan US\$171.00.

Alende ne'e, lezada kontinua konfirma faktu hotu iha akuzasaun no deklarara katak depoisde akontesimentu ne'e lezada ba halo tratamentu iha óspital no kontinua ba hela Uma Mahon durante loron ida no fila fali ba uma família sira konsege tuur hamutuk no rezolve ona problema ne'e no arguidu husu ona deskulpa ba lezada to'o agora arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, mezmus sira di'ak malu ona maibé atu prevene krime ne'e akontese tan iha futuru. Nune'e husu ba tribunál atu kondena arguidu ho pena prizaun fulan ida suspende ba tinan ida.

Enkuantu defeza haktuir katak arguidu konfesa faktu ne'ebe konstitui ba krime ne'ebé nia komete, di'ak malu ona ho lezada, arrepende ninia hahalok, foin primeiravés komete krime no mai hatan iha tribunál, bazeia konsiderasaun hirak ne'e husu ba tribunál atu kondena arguidu ho pena ne'ebé justu hodi garantia sira nia moris hamutuk iha futuru.

Desizaun

Depoisde avalia faktu hotu, tribunál prova katak arguidu basa dala barak iha lezada nia hasan parte karuk no loos, rasta lezada no buti lezada nia ibun.

Bazeia ba faktu provadu hirak ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

10. Krime ofensa ba integridade física simples ho natureza violência doméstica

Nú. Prosesu : 0009/21. VQVQQ
Kompozisaun Tribunál : Singulár
Juis : Dra. Sribuana da Costa
Prokurador : Dr. Julio da Silva Correia
Defeza : Dr. Antonio Fernandes
Desizaun : Pena prizaun fulan 4 suspende tinan 1

Iha 21 Marsu 2022, Tribunál Distrital Baukau liu husi tribunál movel iha Munisípiu Vikeke prezide Julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguida SX hasoru nia la'en, iha Munisípiu Vikeke.

Akuzasaun prokuradór

Prokuradór akuza katak iha 18 Feveireiru 2021, iha oras tuku 19:00 kalan, arguida foti ai-pedasuk baku dala ida iha lezadu nia liman laran parte loos, rakut lezadu nia hirus matan no tata lezadu nia liman parte loos. Antes agresaun ne'e. arguida ho lezadu diskute malu kona-ba lezadu halo lakon osan US\$10.00, nune'e mosu agresaun hirak ne'e.

Prokuradora akuza arguida kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguida konfesa faktu hotu iha akuzasaun, arrepende nia hahalok, foin primeiravés mai hatan iha tribunál, depoisde akontesementu ne'e di'ak malu ona ho lezadu no to'o agora la baku ona lezadu.

Alende ne'e, lezadu kontinua konfirma faktu hotu iha akuzasaun no deklarata katak di'ak malu ona ho arguida no depoisde akontesimentu ne'e, arguida la halo ona agresaun hasoru lezadu.

Alegasaun final

Prokurador konsidera arguida provadu komete krime hasoru lezada, bazeia ba konfisaun arguida nian no konfirma mos husi lezada, mezmusira di'ak malu ona maibe atu prevene iha futuru arguida repete tan hahalok hanesan. Nune'e husu ba tribunál atu kondena arguida ho pena prizaun tinan ida suspende ba tinan ida.

Entretantu, defeza husu ba tribunál atu fó pena ne'ebé justu no adekua ba arguida ho konsiderasaun sira katak arguida konfesa, arrepende ninia hahalok, di'ak malu ona ho lezadu no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguida foti ai- pedasuk baku dala ida iha lezadu nia liman laran parte loos, rakut lezadu nia hirus matan no tata lezadu nia liman parte loos.

Bazeia ba faktu provadu sira ne'e no tetu mos sirkunstánsia atenuante sira hanesan arguida konfesa, arrepende ninia hahalok, foin primeiravés mai hatan iha tribunál no di'ak malu ona ho lezadu, nune'e tribunál konklui prosesu ne'e kondena arguida ho pena prizaun fulan haat suspende ba tinan ida.

11. Krime ofensa ba integridade física simples ho natureza violência doméstica no ameasa

Nú. Prosesu	: 0001/21. VQLLT
Kompozisaun Tribunál	: Singulár
Juis	: Dra. Sribuana da Costa
Prokuradora	: Dr. Julio da Silva Correia
Defeza	: Dr. Antonio Fernandes
Desizaun	: Omologa no Pena prizaun fulan 3 suspende ba tinan 1

Iha 21 Marsu 2022, Tribunál Distrital Baukau liuhusi tribunál movel iha Munisípiu Vikeke prezide Julgamentu leitura sentensa ba krime ofensa ba integridade física simples ho natureza violência doméstica no ameasa ne'ebé envolve arguidu Lda hasoru nia feen, iha Munisípiu Vikeke.

Akuzasaun prokurador

Prokurador akuza katak iha 24 Janeiro 2020, iha oras tuku 12:00 kalan, arguidu dehan ba lezada atu toba hamutuk ho arguidu, maibe lezada rezeita no toba hamutuk fali ho oan sira, ho nune'e arguidu ameasa lezada dehan "*ó mangame orsida hau oho tiha ó,*" tauk ho arguidu ninia ameasa ne'e lezada halai, arguidu duni tuir toman lezada hodi tuku dala ida iha lezada nia ulun, tuku dala ida iha lezada nia kabun no tuku dala ida iha lezada nia hasan.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD no artigu 157 KP kona-ba ameasa ho moldura penál to'o tinan 3 ka multa.

Tentativa konsiliaun

Antes tama ba produsaun ba prova, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu no lezada relasiona ho krime ameasa tanba kazu ne'e klasifika nu'udar krime semi públiku no nia prosedimentu depende ba keixa.

Iha prosesu konsiliaun ne'e, lezada hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa dezisténsia keixa ne'e. Entretantu ba krime ofensa ba integridade física simples ho natureza violénsia doméstika, tribunál kontinua ba prosesu julgamentu.

Produsaun ba prova sira

Iha prosesu julgamentu arguidu konfesa faktu hotu iha akuzasaun, arrepende nia hahalok, promete sei la komete tan krime hanesan iha futuru no depoisde akontesimentu ne'e sira di'ak malu kedas, husu ona deskulpa ba lezada, la baku ona lezada, moris hamutuk desde 1998 iha oan nain hitu, foin primeiravés baku lezada no arguidu serbisu nu'udar agrikultór rezultadu hodi sutenta de'it ba família.

Alende ne'e lezada kontinua konfirma faktu hotu iha akuzasaun no deklarara katak rezeita toba ho arguidu, tanba iha akontesimentu ne'e arguidu ho kondisaun lanu, no depoisde akontesimentu ne'e sira di'ak malu ona.

Alegasaun finál

Prokuradór haktuir katak mezmua sira di'ak malu ona no moris hamutuk nafatin hanesan feen-la'en atu halo prevensaun arguidu lakomete tan nia hahalok ne'e iha futuru hodi labele hatoman-an uza violénsia hasoru lezada no oan sira, nune'e husu ba tribunál atu aplika pena prizaun fulan ida suspende ba tinan ida.

Enkuantu defeza haktuir katak arguidu konfesa faktu ne'ebé konstitui ba krime ne'e, di'ak malu ona, arrepende ninia hahalok, foin primeiravés halo agresaun hasoru lezada, ho razaun hirak ne'e husu ba tribunál aplika pena ne'ebé justu ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ulun, tuku dala ida iha lezada nia kabun no tuku dala ida iha lezada nia hasan.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

12. Krime ofensa ba integridade fízika simples ho natureza violénsia doméstika

Nú. Prosesu : 0012/21. VQVQQ
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araujo
Defeza : Dr. Sidonio Maria Sarmiento
Desizaun : Pena prizaun fulan 1 suspende ba tinan 1

Iha 21 Marsu 2022, Tribunál Distrital Baukau liuhusi tribunál movel iha Munisípiu Vikeke prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu F hasoru nia oan ho idade (tinan 5), iha Munisípiu Vikeke.

Akuzasaun prokuradór

Prokuradór akuza katak iha 04 Marsu 2021, iha oras tuku 16:45 lokraik, lezadu halimar iha uma derepente arguidu mosu mai uma baku rahun tiha vidru janela uma nian no arguidu ba kaer lezadu nia ain rua atu riba ba rai mak lezadu nia inan hakilar hafoin arguidu husik lezadu. Arguidu foti fali ai-sanak baku dala ida iha lezadu nia kotuk laran ikus arguidu kous lezadu tama ba uma laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35 LKVD.

Produsaun ba prova sira

Iha prosesu julgamentu, arguidu deklara katak arguidu haree hela televizaun mak lezadu hafu'u fali ne'e mak arguidu nervozu sai ba liur halo agresan hanesan iha akuzasaun, lezadu tanis arguidu kous lezadu ba fali uma laran tanba hanoin fali lezadu. Arguidu nia uma uma besik loos Uma Mahon no Uma Mahon mak informa ba Polísia, depoisde akontese di'ak malu ona no arguidu mak nafatin tau matan ba lezadu nu'udar aman, arpende nia hahalok no arguidu nu'udar agrikultór rezultadu sustenta deit ba família.

Alende ne'e lezadu ne'ebé akompaña husi nia inan konfirma faktu hotu iha akuzasaun no deklara katak depoisde akontesimentu ne'e arguidu la baku ona lezadu.

Alegasaun finál

Prokuradór haktuir katak akuzasaun ne'ebé imputa ba arguidu ne'e provadu hotu bazeia ba arguidu nia deklarasaun no lezadu nia konfirmasaun, tanba ne'e husu ba tribunál atu kondena arguidu ho pena prizaun fulan ida suspende ba tinan ida.

Enkuantu defeza haktuir katak, depoisde arguidu baku tiha lezadu, arguidu rasik hatudu nia arrendementu iha momentu ne'e kedas, foin primeiravés mai hatan iha tribunál no kopera di'ak ho justisa. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu mosu mai uma baku rahun tiha vidru janela uma nian no arguidu ba kaer lezadu nia ain rua atu riba ba rai mak lezadu nia inan hakilar hafoin arguidu husik lezadu. Arguidu foti fali ai-sanak baku dala ida iha lezadu nia kotuk laran ikus arguidu kous lezadu tama ba uma laran.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezadu, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

13. Krime ofensa ba integridade fízika simples ho natureza violénsia doméstika

Nú. Prosesu : 0007/21. VQSIC
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araújo
Defeza : Dr. Antonio Fernandes
Desizaun : Pena prizaun fulan 6 suspende ba tinan 1

Iha 21 Marsu 2022, Tribunál Distrital Baukau liuhusi tribunál movel iha Munisípiu Vikeke prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DP hasoru nia feen, iha Munisípiu Vikeke.

Akuzasaun prokuradór

Prokuradór akuza katak iha 23 Marsu 2021, iha oras tuku 14:00 lokraik, arguidu nia subriñu ba iha lezada no arguidu nia uma husu nia primu no lezada hatan katak iha sorin hela no lezada la haruka subriñu tuur. Ho nune'e bainhira arguidu ho lezada ba to'os sira diskute malu kona-ba kona ba lezada la bolu arguidu nia nia subriñu tuur, nune'e arguidu nervozu buti lezada nia kakorok no kaer lezada fuuk rezulta lezada monu ba rai.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende nia hahalok, foin primeiravés mai hatan iha tribunál, depoisde akontesimentu ne'e husu ona deskulpa ba lezada, di'ak malu ona no to'o agora la baku ona lezada.

Alende ne'e, lezada kontinua konfirma faktu hotu iha akuzasaun no deklara katak depoisde akontesimentu ne'e lezada ba hato'o keixa iha polisia no kontinua ba halo tratamentu iha Sentru Saude Vikeke, depoisde akontesimentu ne'e sira di'ak malu kedas no to'o agora arguidu la baku ona lezadu.

Alegasaun finál

Prokuradór haktuir katak tanba de'it lezada la bolu sira nia subriñu tuur no informa katak nia primu iha sorin, ho motivasaun ne'e la merese arguidu halo agresaun hasoru lezada, mezmu arguidu konfesa faktu hotu, maibé prokuradór intende katak krime ne'e iziste, tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu aplika pena ne'ebé justu ba arguidu ho konsiderasaun sira katak arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu buti lezada nia kakorok no kaer lezada nia fuuk rezulta lezada monu ba rai.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

14. Krime ofensa ba integridade fízika simples ho natureza violénsia doméstika

Nú. Prosesu	: 0048/21. VQVQQ
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento
Desizaun	: Pena multa US\$15.00

Iha 24 Marsu 2022, Tribunál Distrital Baukau liuhusi tribunál movel iha Munisípiu Vikeke prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu IS hasoru nia feen, iha Munisípiu Vikeke.

Akuzasaun prokuradór

Prokuradór akuza katak iha 05 Outubru 2021, iha oras tuku 12:00 meiodia, arguidu lori ai-sanak baku dala ida iha lezada nia liman parte karuk, baku dala ida iha lezada nia ain no baku dala ida iha lezada nia kotuk laran. Antes agresaun ne'e, arguidu ho lezada diskute malu kona-ba arguidu deskofia lezada ba mane seluk, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa sein rezerva ba akuzasaun no deklarata katak depoisde akontese sira di'ak malu ona, arrepende ninia hahalok foin primeiravés mai hatan iha tribunál no arguidu nu'udar PNTL ho vensimentu kada fulan US\$275.00.

Alende ne'e, lezada kontinua konfirma faktu hotu iha akuzasaun no deklarata katak depoisde akontesementu ne'e sira di'ak malu ona no to'o agora arguidu la komete ona krime hasoru lezada.

Alegasaun finál

Prokuradór haktuir katak arguidu konfesa faktu hotu ne'ebe imputa ba nia lezada mós konfirma, arguidu nu'udar membru PNTL tuir loloos komprende regra sira kona ba krime maibé pelu kontrariu arguidu mak halo fali agresaun hasoru lezada nu'udar nia feen. Tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza haktuir katak produsaun prova arguidu konfesa s faktu ne'ebe imputa ba nia no depoisde akontese sira di'ak malu no to'o agora arguidu mós la baku ona lezada, arrepende ba nia hahalok no foin primeives mai hatan iha tribunal. Tanba ne'e husu ba tribunál atu aplika pena ne'ebe kamaan ba arguidu

Desizaun

Depoisde avalia faktu hotu, tribunál prova katak arguidu lori ai-sanak baku dala ida iha lezada nia liman parte karuk, baku dala ida iha lezada nia ain no baku dala ida iha lezada nia kotuk laran.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu 0,50 sentavus kada loran durante loran 30. Tribunál mós fiksa pena alternativa durante loran 20 prizaun, bainhira arguidu la kumpri pena multa refere.

15. Krime ofensa ba integridade fízika simples ho natureza violénsia doméstika

Nú. Prosesu	: 0015/21. VQSIC
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento
Desizaun	: Pena multa US\$15.00

Iha 24 Marsu 2022, Tribunál Distrital Baukau liuhusi tribunál movel iha Munisípiu Vikeke prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 10 Agostu 2021, iha oras tuku 04:00 madrugada, arguidu tuku dala ida iha lezada nia matan fukun parte loos no tuku dala ida iha lezada nia reen toos. Antes agresaun ne'e, arguidu ho lezada diskute malu kona-ba arguidu lori feto bai ha sira nia uma, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak feto ne'e arguidu nia prima, tanba lezada la kuñese nune'e sira diskute malu. Arguidu deklarata liután katak arrepende nia hahalok, promete sei la baku tan lezada iha futuru, foin primeiravés mai hatan iha tribunál no arguidu nu'udar agrikultór rezultadu sustenta de'it ba família.

Alende ne'e, lezada kontinua konfirma faktu sira iha akuzasaun no deklarata katak depoisde akontesementu ne'e lezada ba hela iha Uma Mahon no bainhira fila mak foin família sira kontata katak feto ne'e arguidu nia tiun nia oan lezada la kuñese, depoisde lezada fila husi Uma Mahon sira di'ak malu kedas no to'o agora arguidu la baku ona lezada.

Alegasaun finál

Prokuradór haktuir katak arguidu la informa kona ba nia prima nia prezensa iha sira nia uma nune'e lezada desconfia, sira diskute malu arguidu halo agresaun hasoru lezada bazeia ba arguidu nia konviksaun no lezada nia konfirmasaun. Haree ba prova sira ne'e, prova katak arguidu komete krime ho livre no vontade rasik halo agresaun hasoru lezada ho razaun hirak ne'e husu ba tribunál aplika pena multa US\$20.00.

Enkuantu defeza husu ba tribunál atu aplika pena ne'ebé kmaan liu ba arguidu ho konsiderasaun sira katak arguidu konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu tuku dala ida iha lezada nia matan fukun parte loos no tuku dala ida iha lezada nia reen-toos.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu 0,50 sentavus kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

16. Krime ofensa ba integridade fízika simples ho natureza violénsia doméstika

Nú. Prosesu : 0040/21. VQSIC

Kompozisaun Tribunál : Singulár
Juis : Dr. José António d. Escurial
Prokuradór : Dr. Bartolomeu de Araújo
Defeza : Dr. Antonio Fernandes
Desizaun : Pena admoestasaun

Iha 24 Marsu 2022, Tribunál Distrital Baukau liuhusi tribunál movel iha Munisípiu Vikeke prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JS hasoru nia oan (*tinan 16*) iha Munisípiu Vikeke.

Akuzasaun Prokuradór

Prokuradór akuza katak iha 19 Agostu 2021, iha oras tuku 20:00 kalan, arguidu tuku dala ida iha lezada nia ulun, rasta lezada nia fuuk no foti ai-sanak baku dala ida iha lezada nia kotuk laran. Antes agresaun ne'e, arguidu haruka lezada atu halo modo, maibé lezada la halo modo, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ninia hahalok, foin primeiravés mai hatan iha tribunál, depoisde akontesimentu ne'e di'ak malu ona ho lezada no to'o agora la baku ona lezada.

Alende ne'e, lezada kontinua konfirma faktu hotu iha akuzasaun no depoisde akontesementu ne'e sira di'ak malu ona nu'udar aman ho oan no to'o agora arguidu la baku ona lezada.

Alegasaun finál

Prokuradór haktuir katak arguidu nia hahalok ne'e priense duni krime ne'ebé prokuradór imputa ba nia. Mezmu sira di'ak malu ona maibé atu prevene arguidu la kontinua nia hahalok iha futuru hasoru membru família inklui lezada, husu ba tribunál atu kondena arguidu ho pena prizaun fulan ida suspende ba tinan ida.

Entretantu haktuir katak arguidu konfesa faktu sira iha akuzasaun, depoisde akontese di'ak malu ona, arrepende ninia hahalok no foin primeiravés mai hatan iha tribunál. Tanba ne'e husu ba tribunál aplika pena admoestasaun ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ulun, rasta lezada nia fuuk no foti ai-sanak baku dala ida iha lezada nia kotuk laran.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no

di'ak malu ona ho lezada, nune'e tribunál konklui prosesu ne'e no kondena arguidu ho pena admoestasaun.

17. Krime ofensa ba integridade fízika simples ho natureza violénsia doméstika

Nú. Prosesu : 0010/21. VQSIC
Kompozisaun Tribunál : Singulár
Juis : Dr. José António d. Escurial
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena multa US\$15.00

Iha 24 Marsu 2022, Tribunál Distritál Baukau liuhusi tribunál movel iha Munisípiu Vikeke prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AF, hasoru nia oan (idade tinan 8), iha Munisípiu Vikeke.

Akuzasaun Prokuradór

Prokuradór akuza katak iha 21 Feveireu 2021, iha oras tuku 17:00 lokraik, lezada halimar hela iha uma oin, derepente arguidu mai ho kondisaun lanu bolu lezada hodi basa dala ida iha lezada nia hasan parte karuk no tebe dala ida iha kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak iha akontesimentu ne'e arguidu ho kondisaun lanu, arrepende nia halalok, foin primeiravés mai hatan iha tribunál, agora la baku ona lezada, arguidu nu'udar professór ho vensimentu kada fulan US\$195.00 hodi sustenta ba nia família.

Alende ne'e, lezada kontinua konfirma faktu hotu iha akuzasaun depoisde akontese sira di'ak malu ona nu'udar aman ho oan antes no depoisde akontese mós arguidu la baku ona lezada.

Alegasaun finál

Prokuradór haktuir katak arguidu nia hahalok ne'e priense duni krime ne'ebé prokuradór imputa ba nia. Arguidu nu'udar professór komprende di'ak regra sira kona-ba krime maibé arguidu hakarak halo krime ne'e hasoru lezada nu'udar nia oan rasik, Mezmu sira di'ak malu ona maibé atu prevene arguidu la kontinua nia hahalok iha futuru hasoru membru família inklui lezada, haree ba arguidu nia vensimentu husu ba tribunál atu kondena arguidu ho pena multa US\$90.00.

Alende ne'e, defeza haktuir katak arguidu konfesa faktu sira iha akuzasaun, depoisde akontese di'ak malu ona, arrepende ninia hahalok no foin primeiravés mai hatan iha tribunál. Tanba ne'e husu ba tribunál aplika pena ne'ebé justu no adekua ba arguidu.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte karuk no tebe dala ida iha lezada nia kotuk laran.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu 0,50 sentavus kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

18. Krime ofensa ba integridade fízika simples ho natureza violénsia doméstika

Nú. Prosesu : 0017/21. VQWTL
Kompozisaun Tribunál : Singulár
Juis : Dr. José António d. Escurial
Prokuradór : Dr. Julio da Silva Correia
Defeza : Dr. Sidonio Maria Sarmento
Desizaun : Pena multa US\$15.00

Iha 24 Marsu 2022, Tribunál Distrital Baukau liuhusi tribunál movel iha Munisípiu Vikeke prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MLL hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 25 Juñu 2021, iha oras tuku 11:00 meiodia, arguidu tuku dala rua iha lezada nia reen-toos, basa dala rua iha lezada nia ulun no tebe dala ida iha lezada nia kotuk laran. Antes agresaun ne'e, arguidu ho lezada diskute malu kona-ba lezada nia avo mate iha Uatulari no lezada hakarak ba, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebe imputa ba nia ne'e loos hotu, depoisde akontese di'ak malu ona ho lezada, arrepende nia hahalok, foin primeiravés mai hatan iha tribunál, agora la baku ona lezada, arguidu nu'udar agrikultór rendimentu la fiksi.

Alende lezada konfirma faktu hotu iha akuzasaun depoisde akontese lezada ba hela ho nia inan aman durante fulan ida mak sira di'ak malu fali, depoisde sira di'ak malu arguidu la baku ona lezada to'o agora.

Alegasaun finál

Prokuradór haktuir katak arguidu provadu komete krime hasoru lezada bazeia ba arguidu nia deklarasaun no lezada nia konfirmasaun. Mezmu sira di'ak malu ona maibé nafatin atu prevene sira nia moris hamutuk iha futuru hodi la repete tan nia hahalok hasoru lezada no membru família sira. Nune'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza haktuir katak arguidu konfesa faktu hotu iha akuzasaun, arrepende ninia hahalok, di'ak malu ona ho lezada no foin primeiravés mai hatan iha tribunál. Tanba ne'e husu ba tribunál aplika pena kmaan ba arguidu.

Desizaun

Depoide avalia faktu hotu, tribunál prova katak arguidu tuku dala rua iha lezada nia reen- toos, basa dala rua iha lezada nia ulun no tebe dala ida iha lezada nia kotuk laran.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu 0,50 sentavus kada laron durante laron 30. Tribunál mós fiksa pena alternativa durante laron 20 prizaun, bainhira arguidu la kumpri pena multa refere.

19. Krime ofensa ba integridade física simples ho natureza violência doméstica

Nú. Prosesu	: 0057/20. VQWTL
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento
Desizaun	: Pena multa US\$30.00

Iha 24 Marsu 2022, Tribunál Distrital Baukau liuhusi tribunál movel iha Munisípiu Vikeke prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu AG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 09 Dezembru 2021, iha oras tuku 12:00 meiodia, arguidu foti ai-sunu baku dala ida iha lezada nia ulun no tebe dala ida iha lezada nia kelen. Antes agresaun ne'e, lezada haruka sira nia oan mane ba sosa modo iha merkadu, maibé fila kleur lezada koalia labarik hasai nanal ba lezada, nune'e lezada hirus no duni tuir labarik monu tun ba rai. Ho nune'e arguidu ho lezada diskute malu no mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende nia hahalok, di'ak malu ona ho lezada, foin primeiravés mai hatan iha tribunál, agora la baku ona lezada, arguidu nu'udar agrikultór rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no deklarata katak depoisde akontesimentu ne'e di'ak malu ona ho arguidu no depoisde akontesimentu ne'e arguidu la komete tan krime seluk hasoru lezada.

Alegasaun finál

Prokuradór haktuir katak arguidu provadu komete krime hasoru lezada bazeia ba arguidu nia deklarasaun no lezada nia konfirmasaun. Mezmu sira di'ak malu ona maibé atu prevene krime hanesan akontese tan iha futuru hasoru lezada no membru família sira selu, husu ba tribunál atu kondena arguidu ho pena multa US\$30.00

Entretantu defeza haktuir katak arguidu konfesa, arrepende nia hahalok, foin primeravés mai hatan iha tribunál, nune'e husu ba tribunál atu kondena arguidu ho pena ne'ebé adekuadu.

Desizaun

Depoisde avalia faktu hotu, tribunál prova katak arguidu baku dala ida iha lezada nia ulun no tebe dala ida iha lezada nia kelen parte loos.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loraun durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

20. Krime ofensa ba integridade fízika simples ho natureza violénsia doméstika

Nú. Prosesu	: 0019/21. VQVQQ
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento
Desizaun	: Pena multa US\$30.00

Iha 24 Marsu 2022, Tribunál Distrital Baukau liuhusi tribunál movei iha Munisípiu Vikeke prezide julgamentu leitura sentensa ba krime ofensa ba integridade fízika simples ho

natureza violéncia doméstika ne'ebé envolve arguidu HL hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 25 Marsu 2021, iha oras tuku 09:30 dadeer, arguidu tuku dala ida iha lezada nia reen-toos, buti dala ida iha lezada nia kakorok no foti ensada baku rahun tiha kadeira masa ida. Antes agresauñ ne'e, arguidu ho lezada diskute malu kona-ba lezada haruka arguidu atu loke etu tukir maibé arguidu la halo tuir lezada nia pedidu nune'e mosu agresauñ hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, di'ak malu ona ho lezada, arrepende nia hahalok, foin primeiravés mai hatan iha tribunál no depoisde akontesimentu ne'e arguidu la baku ona lezada, arguidu nu'udar professór ho vensimentu kada fulan US\$349.00.

Alende ne'e lezada konfirma faktu hotu iha akuzasaun no deklara katak, depoisde akontesementu ne'e sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada bazeia ba konfisaun arguidu nian no konfirma mós husi lezada, arguidu nu'udar professór komidade hotu respeito nia tanba edukador iha komidade nia leet, maibé arguidu la hatudu ezemplu di'ak ba komidade sira seluk, mezmú sira di'ak malu ona maibé atu prevene arguidu komete tan krime hanesan iha futuru. Ho nune'e husu ba tribunál atu kondena arguidu ho pena multa US\$30.00

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende nia hahalok, foin primeiravés mai hatan iha tribunál no di'ak malu ona ho lezada.

Desizaun

Depoisde avalia faktu hotu, tribunál prova katak arguidu tuku dala ida iha lezada nia reen-toos, buti dala ida iha lezada nia kakorok no foti ensada baku rahun tiha kadeira masa ida.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada lorañ durante lorañ 30. Tribunál mós fiksa pena alternativa durante lorañ 20 prizaun, bainhira arguidu la kumpri pena multa refere.

21. Krime danu simples

Nú. Prosesu : 0010/21. VQWTL
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araújo
Defeza : Dr. Antonio Fernandes
Desizaun : Omologa dezisténsia keixa

Iha 24 Marsu 2022, Tribunál Distrital Baukau liuhusi tribunál movel Iha Munisípiu Vikeke prezide julgament tentativa konsiliaun ba krime danu simples ne'ebé envolve arguidu Venancio Ffreitas hasoru lezadu Mario Soares, iha Postu Administrativu Uatulari Munisípiu Vikeke.

Akuzasaun Prokuradór

Prokuradór akuza katak iha 12 Fevreiro 2021, arguidu tebe rahun lezadu nia meja ho valor US\$100.00. Antes agresaun ne'e, arguidu ho lezadu diskute malu kona-ba serimonia kultura Timor nian atu koa manu hodi haree kona-ba lezadu nia feton mate ne'e kauza husi saida, maibé lezadu la aseita tanba iha lezadu ninia relijiaun ida ne'e la ejiste, ho nune'e arguidu halo agresaun ne'e.

Prokuradór akuza arguidu kontra artigu 258 KP kona-ba danu simples ho moldura penál to'o tinan 3 prizau ka multa.

Tentativa konsiliaun

Antes tama ba produsaun ba prova bazeia ba artigu 262 Kódigu Prosesu Penál (KPP) kona-ba tentativa ba konsiliaun, juis husu atu halo tentativa konsiliaun ba arguidu no lezadu.

Iha prosesu tentativa konsiliaun ne'e, lezadu hakarak dezisté ninia keixa hasoru arguidu, tanba sira mesak família no arguidu husu ona deskupa ba lezadu no arguidu mós fó ona osan hodi troka meja ne'ebé arguidu tebe rahun.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, tribunál konklui prosesu ne'e no omologa akordu ne'e.

22. Krime ofensa ba integridade fizika simples ho natureza violénsia doméstika no arma brankas

Nú. prosesu : 0037/19. MNMNT
Kompozisaun Tribunál : Koletivu

Juis : Dra. Sribuana da Costa no Dra. Florencia Freias, Dr. José António d. Escurial
Prokuradór : Dr. Ambrosio Rangel Freitas
Defeza : Dr. Grigório M. de Lima
Desizaun : Pena prizaun tinan 3 suspende ba tinan 1

Iha 28 Marsu 2022, Tribunál Distrital Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika no arma brankas ne'ebé envolve arguidu QFSD hasoru nia bin ASCD, nia tiun AS no Estadu RDTL, iha Munisipiu Manatuto.

Akuzasaun Prokuradór

Prokuradór akuza katak iha 16 Juñu 2019, iha oras tuku 19:00 kalan, arguidu tebe dala ida iha lezada ASCD nia ain parte loos, tuku dala rua iha lezada nia ulun no tuku dala ida iha lezada nia tilun hun rezulta lezada monu ba rai, ho nune'e lezadu AS dehan ba arguidu nune'e "*nia mak kalan lora te'in ba ita han, tanba sa ó baku nia,*" rona tiha ne'e arguidu halai tama ba uma laran foti katana sai mai liur atu taa lezadu AS, maibé lezadu kaer tiha katana no sira rasta malu katana monu tun tiha ba rai, hafoin arguidu riba lezadu ba iha rai. Kazu ne'e akontese bainhira lezada ASCD haruka sira nia alin mane fase bikan.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o 3 tinan ka multa konjuga ho artigu 2, 3 (c), 35 (b) no 36 LKVD no artigu 20 (1), artigu 2 (alinea f) Lei Arma Brankas ho moldura penál tinan 3 to'o tinan 6.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu, di'ak malu ona ho lezada ASCD nu'udar bin no lezadu AS nu'udar tiun, foin primeiravés mai hatan iha tribunál no arrepende ona nia hahalok.

Alende ne'e, lezada ASCD no lezadu AS konfirma faktu hotu iha akuzasaun no deklara mós katak depoisde akontesimentu ne'e sira di'ak malu ona.

Alegasaun finál

Prokuradór haktuir katak arguidu provadu komete krime hasoru lezada no lezadu, bazeia ba konfisaun arguidu nian no konfirma mós husi lezada no lezadu, mezmu nune'e atu prevene krime ne'e akontese tan iha futuru no prevene arguidu utiliza katan la tuir nia funsaun, husu ba tribunál atu kondena arguidu ho pena prizaun tinan tolu suspende ba tinan haat.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun sira katak, arguidu konfesa, arrepende nia hahalok, foin primeiravés mai hatan iha tribunál no di'ak malu ona ho lezada no lezadu.

Desizaun

Depoisde avalia faktu hotu, tribunál prova katak arguidu tebe dala ida iha lezada ASCD nia ain parte loos, tuku dala rua iha lezada nia ulun no tuku dala ida iha lezada nia tilun hun rezulta lezada monu ba rai, ho nune'e lezadu AS dehan ba arguidu nune'e "*nia mak kalan laron te'in ba ita han, tanba sa ó baku nia,*" rona tiha ne'e arguidu halai tama ba uma laran foti katana sai mai liur atu taa lezadu AS, maibé lezadu kaer tiha katana no sira rasta malu katana monu tun tiha ba rai, hafoin arguidu riba lezadu ba iha rai.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada no lezadu, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl